

愚齋存稿初刊

三

憲  
帝  
春  
秋  
經

愚齋存稟卷第三目錄

奏疏三

籌辦張家口至恰克圖電線工程摺

遵查輪電兩局款目酌定報效銀數並陳辦理艱難情

形摺

輪船收支清單

電局收支清單並附

請飭部注銷商輪運漕回空二成免稅案片

驗收盧保鐵路首段工程並趕辦全路情形摺

請派鐵路差遣人員片

請飭部另行撥款片

遵旨具陳練兵籌餉商務各事宜摺

練兵清單  
籌餉清單

商務

清單並附

密陳補救時事片

請密諭各省慎重交涉片

愚齋存藁卷第三

奏疏三

籌辦張家口至恰克圖電線工程摺

光緒二十五年二月

奏爲遵

旨籌辦張家口至恰克圖邊境電報工程艱鉅集款派員以赴中俄接線成約期限恭摺仰祈

聖鑒事竊自光緒六年

臣

奉文創設電報總局開辦十

八年通行二十二省漸有成效並於吳淞福州廈門香港與英丹國水線相接於鎮南關東興蒙自思茅與法國旱線相接於騰越邊界紅蚌河與英國旱線相接於

琿春黑河屯恰克圖伊犁與俄國旱線相接皆與各該國訂立條款至詳且慎誠以電報雖由商辦

國計軍謀動關重大慮患防弊不得不周近年眈眈逐逐權利所在多爲外侵獨電報一端洋線界限尙未踰越尺寸維持因應常用兢兢光緒十八年三月俄國使臣喀希尼赴總理衙門請造恰克圖線與彼相接當蒙特派李鴻章與俄國使臣商辦其時李鴻章派臣議定條約十款其第三款訂定中國設線至恰克圖買賣城相接自畫押日起限五年設妥是年七月畫押曾由總理衙門奏明展造恰克圖線應用經費甚鉅卽常年用

費亦屬繁重恰線與水線爭利關涉商務擬勸諭華商  
設法籌本辦理毋庸請領官本以伸報効並將約款恭  
呈

御覽欽奉

硃批依議欽此嗣據俄使屢催開辦臣始飭電局添招  
商股洋銀六十萬元購料鳩工卽於二十三年四月委  
派天津電報局員直隸候補直隸州知州王繼善先由  
京城造至張家口九月又派前奉天營口同知陳忠偉  
等馳赴庫倫恰克圖探辦電桿一面另派布政使銜分  
省補用道余思詒總辦工程據陳忠偉等砍運官木庫

倫至恰克圖五千五百餘根又庫倫至烏得九千根在山未運已撥用規銀八萬四千兩余思詒辦理工程已撥用規銀八萬六千餘兩所造綫路止有庫倫至恰克圖五百餘里外洋所購電綫及各項材料並不在內比較歷辦各處電工多寡已形懸絕而該員等猶有添請鉅款之稟殊出意外至由張家口抵庫倫尙有一千八百五十里程逾三倍一片沙漠絕無人煙採運工作較庫倫恰克圖一段艱難更甚非另擇熟悉電務習勞耐苦人員別籌辦法委任責成必致糜費曠時歲事逾期失信鄰國現據各商董公舉前辦江西電局已革在任

選用道江西餘干縣知縣何其坦派令帶同洋匠工役  
尅期馳往議定本年三月杪由張家口開工自南至北  
次第趲造統限九十月一律告竣除洋員學生外一切  
員薪夫工弁兵各費限以八萬兩爲度陸路設綫料物  
繁重桿木爲最庫倫至烏得一帶應用電桿已砍未運  
係由理藩院轉行各蒙旗就地取材作爲蒙古報効之  
款照章給獎其由烏得至張家口更無電桿可採業經  
臣  
由電奏蒙

諭旨准於多倫諾爾屬圍採運桿木一萬根所有前兩  
項電桿統由何其坦保薦之京城西光裕商號李金堂

李錫麟具結承攬包運電桿每根銀八兩至八兩五錢  
電線材料每百斤銀五兩按五里分屯隨地取用運料  
辦工一氣貫注期於以省補費以速補遲不至竭蹶延  
誤中國辦理電報歷年既久舉凡辦料估工皆與西國  
公司參互考核一事一物悉有定程承辦者向鮮越軼  
範圍余思詒陳忠偉等經辦庫倫至恰克圖電工費倍  
常度如非挪蝕亦恐虛糜現已催令報銷如查有弊混  
再當據實參辦不敢稍有袒護致啟效尤之漸惟口外  
沙磧艱苦迥異內地前事者既以辦理不善而去後派  
人員莫不視為畏途此次展造邊線總理衙門雖奏明

勸諭華商設法籌本然事關邊防交涉工程實異尋常  
擬懇由臣將在事人員先行造冊送部查核一俟全工  
告竣查明時日用費電工三者均能符限制中程度卽  
行籲懇

天恩分別給獎否則立予分別懲究懸賞罰以示之的  
庶咸知潔已竭力奮迅圖功可無貽誤要工之慮再張  
家口至庫倫桿木綫料屯積繁多該處均係沙漠並無  
民戶必須撥派蒙旗弁兵看守以免散失卽將來綫成  
之後亦須按段派兵巡護仍由電局酌給津貼除由臣

咨商辦理外應請

飭下綏遠城將軍烏里雅蘇台將軍察哈爾都統庫倫  
辦事大臣轉飭各蒙旗迅速撥派弁兵沿途守護以免  
疏虞是否有當伏乞

皇太后

皇上聖鑒謹

奏 本月二十六日奉

硃批該衙門知道欽此

遵查輪電兩局款目酌定報効銀數並陳辦理艱難情形  
摺光緒二十五年七月

奏爲遵

旨查明輪船電報兩商局歷年收支盈餘數目酌定常年歸公銀數以盡報効之忱並瀝陳艱難推廣情形恭摺仰祈

聖鑒事竊臣恭讀邸鈔光緒二十五年六月初四日內

閣奉

上諭徐桐所奏輪船招商局電報局及開平礦務局近年獲利不貲而盈餘利息如何酌提歸公未經議及是

徒有收回利權之名並無裨益公家之實著責成辦理輪船電綫事務大理寺少卿盛宣懷督飭在事官商人等迅將經管各項近年收支數目亦限三個月分晰開具清單酌定餘利歸公司章程專案奏明請旨定奪等因欽此正在督飭兩局商董欽遵辦理間旋承准

欽差查辦事件大臣剛毅咨奉

上諭有人奏當稅釐卡鹽課等弊不一而足招商電報各局弊在假公濟私請飭清查等語現當整頓餉源之際若如所奏弊竝甚多亟應從嚴釐剔卽著剛毅先就江南一省認真查辦其招商電報各局歷年收支底冊

並著督同盛宣懷一併澈查除股商官利外所有盈餘  
之款均著酌定成數提充公用毋任承辦各員稍有侵  
蝕以杜積弊而裕餉需等因欽此咨行欽遵前來當據  
輪船電報兩局商董將歷年收支帳冊並開具清單彙  
齊呈由剛毅督同臣逐一澈查船局自光緒十一年收  
回旗昌洋行船棧各產起截至光緒二十四年止接辦  
十三年半除歸還原借官款銀一百十九萬餘兩續將  
眾商應得利息及保險公積添入股本銀二百萬兩外  
結存盈餘銀九十萬七千餘兩均以充添置輪船棧房  
之用尙不敷銀三十五萬六千兩電局自光緒八年商

辦起截至光緒二十四年止倡辦十六年除歸還各省  
官商借款銀六十二萬餘兩外結存盈餘洋銀八十萬  
元皆遞年撥作眾商添入股本爲添造各路電綫之用  
現在接造怡克圖電綫尙不敷銀二十一萬五千餘兩  
計兩局前獲之盈餘皆陸續擴充之資本並無現銀可  
以提用眾商公議請嗣後按年酌提盈餘二成以盡報  
効之忱剛毅與臣熟商謂必須飭董稟定每年實在充  
公數目臣復以急公糾難之義往復勸諭各股商遵照  
自光緒二十五年爲始除捐辦南北洋兩公學常年經  
費十三萬四千兩外每年報効實銀船局六萬電局四

萬共十萬兩仍按二成核計如船局餘利過七十萬兩電局餘利過四十七萬兩照數加捐如遇虧折不敷商股官利此項報効展至下年分攤補繳此外免再派捐業經剛毅核准

奏覆在案伏惟船電兩局爲華商合眾與洋商爭利之創舉中國士夫狃於各自爲謀之故習見船電兩局之規模遠大詫爲無窮利藪不知析爲千百股商仍皆銖銖寸寸之微利也宇內商務各國通商之後與閉關自守之時事勢殊形經營異轍絲茶百貨之商或屢起屢蹶或一蹶不振受病之由皆在散而不聚使皆能取法